

अंबेडकर अस्पताल-बच्चे मौत

रईपुर के डॉक्टर बाबासाहेब अंबेडकर स्मृति शासकीय अस्पताल-मेकाहारा म काली तीन झिन लइका मनके संदिग्ध परिस्थिति म मउत होगे। एखर बर वॉर्ड म ऑक्सीजन आपूर्ति म बाधा होय के आरोप लगाय गे हावय। मुख्यमंत्री ह ए मामला ल गंभीरता ले लेवत स्वास्थ्य विभाग के बड़का अधिकारी मन ल जांच के निरदेस दीन हे। आज बिहनिया रईपुर विमानतल म पत्रकार मन ले गोठबात करत खानी ओमन किहीन कि दोसी मन ल बख्से नइ जाही।

इही बीच, पुलिस ह अस्पताल के ऑक्सीजन आपूर्ति संयंत्र म काम करत करमचारी ल गिरफ्तार कर लेहे। ओखर उपर ड्यूटी के बेरा सराब पीके सोय के आरोप हे।

उहें, स्वास्थ्य विभाग के प्रमुख सचिव सुब्रत साहू ह आज बिहनिया मेकाहारा के दउरा करीन। बाद म एक ठिन पत्रकारवार्ता म ओमन किहीन कि ऐति तीनों लइका मनके मउत ऑक्सीजन के कमी ले नइ फेर दूसर कारण ले होय हे। ओमन बतईन कि वार्ड म मरीज मन ल दे जावत ऑक्सीजन के दबाव घलो कमती नइ होय रिहीस। फेर ऑक्सीजन के मात्रा कम होय के चेतावनी जरूरी मिले रिहीस, जेखर उपर तुरते कार्रवाई करके आपूर्ति ल बहाल कर दे गे रिहीस। श्री साहू ह किहीन कि ए मामला के जांच बर निदेसक चिकित्सा शिक्षा के अगुवई म एक ठिन उच्च स्तरीय समिति बनाय गे हावय। ए समिति ल काली संज्ञा रिपोर्ट दे बर केहे गे हावय।

बच्चे मौत-कांग्रेस

इही बीच, अंबेडकर अस्पताल म लइका मनके मउत होय के मामला आगू आय के बाद आज मंझनिया प्रदेश कांग्रेस अध्यक्ष भूपेश बघेल ह कांग्रेस के दूसर बड़का नेता मनके संग अस्पताल के दउरा करीन। ओमन ह ए घटना ल दुर्भाग्यपूर्ण बतावत स्वास्थ्य मंत्री अजय चंद्राकर ले तुरते इस्तीफा के मांग करीन हे। कांग्रेस ह ए मामला के अपन स्तर म जांच बर पार्टी के चिकित्सा विभाग के चेयरमेन राकेश गुप्ता के अगुवई म एक ठिन टीम घलो बनाईन हे।

स्वाईन फ्लू-मौत

छत्तीसगढ़ म स्वाईन फ्लू के मामला बाढ़त जात हे। स्वाईन फ्लू ले अभी तक प्रदेश म करीबन आधा दर्जन लोगन के मउत होय के खबर हे। आज रईपुर के एक ठिन निजी अस्पताल म स्वाईन फ्लू ले परभावित एक झिन डॉक्टर के इलाज के दउरान मउत होगे। दुरुग के रहइया डॉक्टर राकेश कोठारी खुदे शिशु रोग विशेषज्ञ रिहीन।

इही बीच, राज्य के स्वास्थ्य मंत्री अजय चंद्राकर ह विभागीय अधिकारी मन ल प्रदेश म स्वाईन फ्लू के रोकथाम अउ बचाव बर सबो जरूरी कदम उठाए के निरदेस दीन हे। ओमन सबो सरकारी अस्पताल के डॉक्टर मन ल चोबीस घंटा सचेत रहे बर किहीन।

नोटबंदी-राजनाथ

गृहमंत्री राजनाथ सिंह ह किहीन हे कि देस म नक्सलवाद, आतंकवाद अउ उग्रवाद के घटना मन म घलो पाछु तीन बछर म कमी आय हे। लखनऊ म राष्ट्रीय जांच एजेंसी के कार्यालय अउ आवासीय परिसर के उद्घाटन के मउका म ओमन किहीन कि जाली नोट अउ आतंकी ल धन देवाय वाले माध्यम मन उपर रोक लगाय ले आतंकवाद ल बड़े झटका लगे हे।

इही बीच, केन्द्रीय वित्त मंत्री अरुण जेटली ह घलो किहीन कि नोटबंदी ले देस के कई ठिन जघा म माओवादी मन ल अउ जम्मू कश्मीर म आतंकवादी मन ल पइसा के तंगी होगे हावय। ओमन ह मुंबई म भारतीय जनता पार्टी डहार ले राखे गे कारीकरम म किहीन कि नोटबंदी के बाद ले कश्मीर म पत्थबाजी के घटना घलो कमती होय हे। एखर अलावा छत्तीसगढ़ जइसन राज्य म माओवादी मन तीर पइसा के कमी होय हे।

माओवादी-गिरफ्तार

दंतेवाड़ा जिला पुलिस ह आज चार झिन माओवादी मन ल गिरफ्तार करीन हे। ए गिरफ्तारी बारसुर, कटेकल्याण, भांसी अउ कुआकोंडा थाना क्षेत्र ले करे गीस। गिरफ्तार माओवादी मन उपर हत्या, आगजनी, लूट जइसन गंभीर अपराध म सामिल रेहे के आरोप हावय।

मुख्यमंत्री-पीएम बैठक

प्रधानमंत्री नरेन्द्र मोदी अउ भाजपा के राष्ट्रीय अध्यक्ष अमित शाह आज नई दिल्ली म भाजपाशासित राज्य के मुख्यमंत्री मनके बइठका लीहीं। ए बइठका बर दिल्ली जाय के पहिली मुख्यमंत्री डॉक्टर रमन सिंह ह आज बिहनिया रईपुर विमानतल म पत्रकार मन ले गोठबात करीन। ओमन किहीन कि ए बइठका म राज्य डहार ले केन्द्र के परमुख योजना ले जुड़े सतरा ठिन आने-आने बिंदु उपर चरचा होही। मुख्यमंत्री काली संज्ञा रईपुर वापस लहुटही।

पोला पर्व

छत्तीसगढ़ के लोकपर्व पोला आज प्रदेशभर म बड़ उछाह के संग मनाय जावत हे। ए परब ल भादो महीना के अमावस्या के दिन मनाय जाथे।

पोला तिहार हमर संस्कृति म पसुधन के महत्ता ल देखाने वाला परब हे। गंवई इलाका मन म एला बहुते धूमधाम ले मनाय जाथे। आज के दिन किसान मन ह बने फसल के कामना के संग अपन बइला मन ल सुधर तरीका ले सजा के ओखर पूजा करथे। संगेसंग छत्तीसगढ़ी व्यंजन के भोग लगाय जाथे अउ कतकोन खेल प्रतियोगिता घलो कराय जाथे। एमा बइला दउड़ अउ गेड़ी दउड़ परमुख हे। पोला के दिन लइका मन ह माटी ले बने खिलौना ले खेलथे।

राज्यपाल बलरामजी दास टंडन अउ मुख्यमंत्री डॉक्टर रमन सिंह ह पोला के मउका म प्रदेश के लोगन ल खास करके किसान भाई मन ल हार्दिक बधई अउ सुभकामना दीन हे। राज्यपाल ह अपन संदेश म किहीन कि पोला के परब ह छत्तीसगढ़ के लोक जीवन म कृषि संस्कृति ले जुड़े हावय। उहें, मुख्यमंत्री ह किहीन कि पोला के परब ह हमर मेहनत करइया किसान मनके जीवन ले जुड़े परमुख परब हे।